

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram sawrkar chuan West Asia buaina avanga khawvel huapa petrol leh diesel man a san zel avangin, sum leh hmanraw renchemna tur hmalakna thar a puang.
2. AMC Corporator thlan tharte chuan nimin khan AMC hnathawh hrang hrangte zirchianna leh inhrilhfiahna hun an hmang.
3. India leh Italy te chuan an thawhdunna chu Special Strategic Partnership-a hlankai an remti
4. Defence Minister Rajnath Singh-a chuan Operation Sindoor chu India-in chak zawk, inringtawk leh theihna sang tak nei rama a insiamchhoh nasat zia lantirtu a ni a ti.

<><><>

GAD AUSTERITY MEASURE

Mizoram sawrkar chuan West Asia buaina avanga khawvel huapa petrol leh diesel man a san tak zel avangin, sum leh hmanraw renchemna tur hmalakna thar a puang a.

General Administration Department chuan Thawhlehi khan thuchhuah siamin, hmalakna tur pawimawh zual te a tarlan zingah Sawrkar department tinah hnathawktu zaa 20 chu in lama hna thawk tura ruahman an ni a, hei hian damdawi in, tui, kawlpheha, disaster response, lirthei leh law and order hna thawkte a huam lova, Aizawl khawpui chhunga traffic jam leh petrol hman tlem nan office kal hun tih danglam a ni bawk.

Kan corr report lo ngaithla ang. (VC)

Inrenchemna tura state sorkarin hmalakna tur a duanah chuan sorkar hnathawkte chu Group hnihah thenin Group khatna ina a huam zinga a mi te chu zing dar 8:30 atanga tlaï dar 4:30 thleng office kal hun bi a tuk sak a, Group hnihna ina a huam zinga mi te chu zing dar 10:30 atanga tlaï dar 6:30 thleng office kal hun bi a tuk sak a ni.

Hei bakah hian kar tin Nilaini sawrkar lirthei hman loh ni (atana puan a ni a, Officer leh staff-te chu kea kal emaw, vantlang lirthei hmang turin an infuih bawk a ni. Sawrkar Meeting-te chu video conferencing hmanga neih hram tur a ni a. Official-a zin chhuahna pawh a tul tawpkhawh-ah lo chuan tih loh tur a ni an ti bawk.

Chief Minister, Minister leh hotu dangte lirthei zui zat chu mahni duhthlanna ngeiin tih tlem tur a ni a, Office-ah light leh fan-te uluk taka hmeh mih tur a ni a, AC pawh hman tlem tur a ni a, Sawrkar building incheina light hman pawh khap a ni bawk. Sawrkar hun hman hrang hrang a, reception leh hospitality-a sum hman thinte chu tlem thei ber tura ruahman a ni a, heng hmalakna te hi puan nghal a nih thu leh thuchhuah dang a awm hma chu hman tur a nih thu an tarlang bawk a ni.

India ram chuan a crude oil hman za a 85chu ram pawn atanga a lak luh a nih avangin, West Asia-a buaina avanga harsatna thleng hian India ram a nghawng nat hma hian hetiang inrenchemna hi Mizoram sawrkar chuan a siam tan niin sorkar thuchhuah chuan a sawi.

<><><>

LOK SABHA MP

Champhai District Development Coordination & Monitoring Committee (DISHA) te chu nimin khan an Chairman Lok Sabha MP Pu Richard Vanlalhmangaiha hovin DC Conference Hall-ah an thukhawm.

Lok Sabha MP Pu Richard Vanlalhmangaiha chuan thu sawiin, Department hrang hrang hnathawh leh hmalaknate chu tha a tih thu sawiin, district tana an inpekna avangin lawmthu a sawi a, scheme leh project an kalpui hrang hrang te a mamawh ber te'n an hlawkpui ngei theih nan duhsakna a hlan tih a sawi a ni.

Thutkhawmah hian Head of Office-ten an department theuh hmalaknate an sawizau a, zawhna awmte an chhang a, hmachhawp an neihte leh harsatna an neihte an sawiho nghal a. MP Pu Richard Vanlalhmangaiha chuan an harsatnate sawrkar laipui hotute hnenah a thlensak tur thu sawiin, Scheme hrang hrang hnuaia hamthatna dawngtu tur (beneficiary) te uluk taka thlang turin a fuih a. DISHA meeting hnunung bera an thu relte bawhzuina a nih dan an thlirho bawk a ni.

(Lalhlupua, Champhai PTC)

<><><>

LUNGLEI DISTRICT ROAD MAINTENANCE

Lunglei District Bawrsap Pi Navneet Mann chuan nimin khan National Highway-54 & 302 kawngpui laih zauh leh siam that hna thawh mek a enfiah.

Kawng siam mek, Theiri-at-Hrangchalkawn, Lungpuzawl-Zobawk leh Sazaikawn-Hauruang huam chhunga hma lakna hrang hranga hmasawn dan leh hmachhawp awmte chu a hmunah kal chilhin Bawrsap hian a enfiah a.

Bawrh sap hi DDMA Zonal Officer-te, DC, I&PR leh Revenue official-te, kawng siam mek enkawltu NHIDCL (National Highways & Infrastructure Development Corporation Limited) leh hna thawktu contractor BRN Infrastructure Private Ltd te'n an tawiawm a. Hna kal meka hmasawna awm dan en hovin, hma lak zel dan tur leh harsatna hrang chin fel dan tur te an sawi ho a ni.

Aizawl–Tuipang NH–54-ah hian Zobawk leh Lungpuizawlah hna thawh mek awmin, kawng laih zauh, lung rem siam, kawng chhuat siam rem leh kawng luan hna te thawh mek a ni a. Lunglei –Tlabung NH–302 hna thawh kal mekah Hrangchalkawn atanga Mizoram Polytechnic Lunglei panna kawng (approach road) siam mek te, Theiriata T-Way Filling Station bul lei minna lai lung rem leh kawng luan mek te, Sazaikawn leh Hauruang inkara hna thawh mekte en dik a ni bawk a. Hna thawh danah hma lakna leh hmasawna hrang hrang hmuh niin, hmun thenkhat erawh chak lehzuah hma lak tui tih a ni a. Bawrh sap chuan fur laia mipuiin harsatna an tawh lohna tur leh chhiatna thlang thei pumpelh nan contractor-te chu chak zawka hma la turin a fuh a. Fur hmaa kawng an luan hman loh turte pawh tha taka enkawl leh thawm that hna thawk turin a chah a ni.

(Dipr)

<><><>

AMC CORPORATORS

Aizawl Municipal Corporation a Corporator thlan tharte chuan nimin khan AMC Conference Hall, Thuampuih AMC hnathawh hrang hrangte zirchianna leh inhrilhfiahna hun an hmang.

Pu H. Lalremtuanga, Aizawl Mayor chuan he hun hi a hawng a. AMC a Officer ten AMC mawhphurhna leh hmalakna hrang hrang te hrilhfiah hun an hmang a ni.

He hunah hian bawlhhlawh khawn leh sawngbawl kawnga dan thar Solid Waste Management Rules, 2026 zirchian a nih bakah, Urban Local Body (Municipal) mawhphurhna leh tihurte zirho a ni a. Dan tharin a phut hrang hrang thuneitute leh mipuite zirtirna hun hman dan tur sawiho a ni a. Dan hnuaiah tha takin AMC hotuten hma lak ni an tum thu tarlan a ni a. Mumal zawka Aizawl khawpui a than theih nan AMC in dan a kenkawh hrang hrang mipuiten tha taka an zawm a tul thu te sawiho a ni bawk a ni.

(Lalhruaitluanga, Aizawl PTC)

<><><>

ONLINE MEDICAL REFERRAL SYSTEM

Health Minister Pi Lalrinpuui chuan nimin khan Online Medical Referral System a tlangzarh.

MINECO a hun hmanah Health Minister Pi Lalrinpuui chuan, ram changkang zawkah chuan Online in an ti emawni tih mai tur a ni a, Mizoram pawhin chutiang tur chuan theihtawp an chhuah mek a ti a, tunlai thiamna hman tangkai kawngah mipui leh Department lam inrem taka hna thawh a pawimawh tih a sawi bawk.

Health Minister chuan Online vangin MUHCS pawh awlsam takin mahni in lum atangin an inziak lut thei tih a sawi a, tuna Online Medical Referral System an tlangzarh tak pawh hi tangkai taka hman theih a nih a beisei thu a sawi a. Pi Lalrinpuui chuan Department han thawk tute pawh lo vil ngun a, hna lut apiang lo chingfel nghal zung zung a, theihtawp a hna lo thawk turin a chah bawk a ni.

Online Medical Referral System hi sorkar hnathawk phaia damlo kal tur ten damdawiin an pan tura an inziahluhna tur a ni a. Damlo te tana awlsamna leh hun khawh ral lohna tur, mahni In atanga tih mai theih tur niin Department tan pawh phaia damlo kalte enkawl dan a lo hriat zung zung theih dawn a ni.

(Corr Ts-a)

<><><>

SMART METRE

Smart Meter hman a nih hnua Electric Bill hmasa berah bill lak hun chhung insiamrem nan a rei bik avangin thla dang aiin pawisa chawi a danglam phah ta deuh niin Power & Electricity Department hotute chuan an sawi.

Akashvani News Aizawl zawhna chhangin Pu Lalhriatpuia, EE chuan Mizoram pumah Smart Meter hmang turin beihpui thlak mek a ni a, tun dinhmunah Aizawl khawpuih hna thawh mek niin - Revenue Sub Division 1 leh Division 2 hnuaiah mi 49540 bawr vel tan Smart Meter an vuah tawh a, Aizawl an zawh hunah District dangah an thawk chhunzawm dawn a ti a.

Electric Bill chungchanga harsatna nei tan, mahni bialtu Sub Division-ah complain theih a ni tih sawiin, an sawiselna a dik ngei a nih chuan hma an laksak thin a ti.

Smart Meter vuah kal lai mekah Department hotute chuan, meter vuah hmabak te chu an Electric Bill hlui lo kawh tha emaw, an consumer no lo hrechiang turin emaw an ngen a, hei hian hna thawh kawngah dik leh tha zawkin a pui thei dawn niin an sawi.

VC

P&E Department hian Mobile Application (PEDM Consumer) an nei a, hemi App atang hian mahni bill pek tawh dan leh hriattur pawimawh hrang hrang hriat theih a ni a, department lam chuan mipui a tam thei ang berin Playstore atanga download in lo hmang thei se an duh thu an sawi bawk a ni.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

INDIA-ITALY

Prime Minister Narendra Modia chuan hlawhtling taka Italy-a hun a hman hnuah New Delhi-ah a lo haw leh tawh. Nimin khan India leh Italy te hian an thawhdunna chu Special Strategic Partnership-a hlankai an remti a. Hei bakah hian thawhdunna ki hrang hrang 15 ah inremna an ziak a. Prime Minister Modi leh Italy PM Giorgia Meloni te an inbiak hnuah heng inremna hi ziah a ni a. Inremna thuthlung ziah zingah hian critical mineral, defence, agriculture, Ayurveda, Science and Technology, tuifinriat inkalpawhna leh lawng chawlhmun dinna kawnga thawhdunna te a tel a. Hei bakah hian chhiah chawi chungchanga dan bawhchhiatna, sum chhehrelh leh firfiakte suma puih do turin an inrem bawk a ni.

Prime Minister Modia chuan thuchhuah siamin ram pahnihten an thawhdunna nasa zawka tihlen an remti a ti a. Joint Strategic Action Plan 2025-26 chuan hmalam huna an thawhdunna tur ruangam a siam dawn a ni a ti bawk..

(Newsonair)

<><><>

DEFENCE MINISTER

Defence Minister Rajnath Singh-a chuan Operation Sindoor chu India-in chak zawk, inringtawh leh theihna sang tak nei rama a insiamchhoh nasat zia lantirtu a ni a ti. Nimina South Korea-a Seoul khawpuia India mi chengte nen an inkawmnaah he thu hi sawiin Pu Singha chuan kha operation kha firfiaka chetna India-in a huat zia tichiangtu a ni a ti bawk.

Defence Minister hian India-South Korea Defence Industry Business Round Table a kaihuai a. Thusawiin ram pahnihten hun lo kal tura ralthuam siam kawngah technology changkang hmangin ralthuam tha tak tak an siam thei dawn a ti bawk.

Ram pahnihte hian defence lama thawhdunna tur inremna pahnih an ziak bawk a ni.

(Newsonair)

<><><>